

TEZAU LITURGIC
4 IULIE

ACATISTUL
SF. MUCENICI
ROMANOVI
DE LA
MOSCOVA
III



MOSCOVA, 2000



Акафист

**святым Царственным
страстотерпцам царю Николаю,
царице Александре, цесаревичу
Алексию, царевнам Ольге,
Татиане, Марии и Анастасии**

Кондак

1

Избранныи покровителие земли Российския, похвальная пеня восписуем вам, благочестие и чистоту жития вашего прославляюще и страдальческий подвиг ваш почитающе. Вы же, имуще велие дерзновение ко Господу, молитесь о земном отечестве вашем и о всех с верою и упованием прибегающих к вам и взывающих: Радуйтесь, святии Царственнии страстотерпцы, земли Российския заступницы.

Икос

1

Ангел Божий, предстояй алтарю Господню, прият молитвы ваша и возложи на кадильницу злату, вкупе с молитвами всех святых; и изыде дым кадильный от руки Ангела пред Бога. Мы же, почитающе достославное житие ваше, глаголем вам: «Веселитесь о Господе и радуйтесь, праведнии» и зовем таковая:

Радуйтесь, предстоящи Престолу Агнца, облечены в ризы белы; Радуйтесь, вкушающие ныне от манны сокровенныя.

Радуйтесь, на высоту добродетелей Христовых восшедшии; Радуйтесь, благая дела, аки фимиам благовонный, Господу принесшии.

Радуйтесь, благодарящи Господа на всякое время; Радуйтесь, гусли седмиструнные, присно Господа восхваляющия.

Радуйтесь, власть царскую яко служение, Богом данное, почитавшии; Радуйтесь, креста сего бремя достойно понесшии.

Радуйтесь, отечество ваше паче жизни временныя возлюбившии; Радуйтесь, страдальческий подвиг за него подъемшии.

Радуйтесь, вы бо есте красота Церкви Христовы; Радуйтесь, Святые Руси похвало и нетленная славо.

Радуйтесь, святии Царственнии страстотерпцы, земли Российския заступницы.

Кондак

2

Видя Всеблагий Господь чистоту сердца твоего, страстотерпче царю Николае, избра ты от рождения на служение Себе. Ты же, быв даже до смерти верен Богу и отечеству твоему, воспевал еси на всяк день хвалу Господу: Аллилуия.

Икос**2**

Разум духовный даровася вам, святой царю Николае, святая царице Александро вкупе со царственными чады вашими, от юности бо познасте истину словес Писания: «Приступите ко Господу и просветитесь, и лица ваша не постыдятся». Темже Христос Бог в добродетелех и жертвеннем служении вашем укрепляше вас. Сего ради примите от нас похвалы сия:

Радуйтесь, благородныя лозы грозды благословеннии; Радуйтесь, благочестивых русских государей достойнии преемницы.

Радуйтесь, о прославлении угодников Божиих ревновавшии; Радуйтесь, святых храмов и обителей создателие.

Радуйтесь, обидимых благосердии заступницы; Радуйтесь, милость народу вашему и по сей день являющии.

Радуйтесь, яко елени на источники водныя ко Господу души устремившии; Радуйтесь, от младых лет сердца возвышена к Богу имевшии.

Радуйтесь, со Христом сочетавшиися; Радуйтесь, благочестия светильницы.

Радуйтесь, блистающии радугою седмицветною даров Духа Божия; Радуйтесь, завет России с Богом утверждавшии.

Радуйтесь, святии Царственнии страстотерпцы, земли Российския заступницы.

Кондак

3

Сила любви Божественная коснуся сердца твоего, святая царице Александро, и познала еси истину веры Православная. Такожде русскою духом соделалася еси и народу твоему матерью явилася еси, древним царицам русским уподобившись. Мнози же человецы, врагом рода христианского возбуждаеми, оклеветоваху и хуляху тя. Ты же евангельски вся со смирением терпела еси, воспеваючи благодарственно Господеви: Аллилуия.

Икос

3

Имуще ревность о богоугождении, святии Царственнии страсотерпцы, провождаете дни своя в молитве и благотворении, еще же о умирении языков и племен попечение имели есте, заступницы земель словенских суще. Мы же, множество благих деяний ваших воспоминающе, с любовью вопием вам сице:

Радуйтесь, святые Александро, Ольго и Татиано, милосердия сестры; Радуйтесь, болезни ранами уязвленных облегчавшия.

Радуйтесь, разже бо Господь сердца ваша огнем любви Своея; Радуйтесь, и нас сего дара сподобляющии.

Радуйтесь, клевету и поношение кротко претерпевшии; Радуйтесь, бысте бо искушени,

да соделаетея искусни пред Богом.
Радуйтеся, образ смиренномудрия нам показующии; Радуйтеся, сладкоуханнии сосуди благодати.

Радуйтея, бысть бо светильник ногам вашим закон Господень и свет стезям вашим; Радуйтеся, чистая зерцала Божественныя премудрости.

Радуйтеся, источницы приснотекущи, реки воды животныя источающии; Радуйтеся, сердца верных напоющии благодатию.

Радуйтеся, святии Царственнии страстотерпцы, земли Российския заступницы.

Кондак

4

Бурю бед и скорбей разделили есте с родителями своими, любовь неизреченною соединении, святыи цесаревиче Алексие с сестрами Ольгою, Татианою, Мариєю и Анастасиею. Измлада имевшии веру нелицемерную и благую совесть, узким путем евангельским море жития земнаго, аки по суху, прешли есте, выну Господу воспевающе: Аллилуия.

Икос

4

Слышаще и видяще ангелонравное житие ваше, о святая царственная чада, и мучителие

ваши сердцами умягчашуся. Вы бо, аки крини благоуханнии, процвели есте в земли Российской, украсивше вертоград святых Церкви Христовы. Сего ради примите от нас песни сия:

Радуйтесь, древа благокоренная, плодоносием добродетелей достолепно украсившаяся; Радуйтесь, радоватися с радующимися и плакати с плачущими навыкнувшии.

Радуйтесь, к любви и попечению о родителях наставляющии; Радуйтесь, юныя ко благу руководствующии.

Радуйтесь, страданиям издетска причастнии; Радуйтесь, мужеству и терпению нас научающии.

Радуйтесь, услаждавшии уста и души словом Божиим; Радуйтесь, побеждающии благим злое.

Радуйтесь, новая Ольго богомудрая, державнаго отца сотаиннице, и Татиано добропобедная; Радуйтесь, Марие, милости исполненная, и Анастасие светолучная.

Радуйтесь, чада царственная, юныя ластовицы небесныя; Радуйтесь, простоты во Христе образ нам подающии.

Радуйтесь, святии Царственнии страстотерпцы, земли Российския заступницы.

Кондак

5

Божественный свет осия лица ваша, яко не о внешнем попечение иместе, но много паче внутренняго человека добродетельми украсити тщастеся. Бысть же знамение чудное, егда схимницы богочестивии затвор свой оставиша, да поклонятся ти, боговенчаный страсотерпче Николае, и благословят тя, воспевающа Господеви: Аллилуия.

Икос

5

Видевше, святии страсотерпцы Царственнии, яко вся в мире сем тленна и преходяща, сокровище свое в Бозе положили есте, о исполнении заповедей евангельских нелицемерное прилежание явивше, да в немощи вашей сила Божия совершается, отечество же ваше ко благоденствию ведясте. Мы же, дивящися преславному житию вашему, воспеваем сице:

Радуйтесь, супругом добрии наставницы; Радуйтесь, родителем в воспитании чад мудрии учителяе.

Радуйтесь, монашествующих покровителие; Радуйтесь, о Церкви Божией попечение имевшии.

Радуйтесь, в житиях святых поучатися возлюбившии; Радуйтесь, подражателие

наследствующих обетования верою и долготерпением.

Радуйтесь, бремена ближних носивши; Радуйтесь, о исполнении воли Божия выну ревновавши.

Радуйтесь, умы и сердца горе обращавши; Радуйтесь, терпеливомудрым нравом украшении.

Радуйтесь, вы бо, ветхаго отложивше человека, плотское мудрование отринули есте; Радуйтесь, от лампы небесныя светильники сердечныя возжегши.

Радуйтесь, святии Царственнии страсотерпцы, земли Российския заступницы.

Кондак

6

Проповедует вся страна Российская, любовь к вам исполненная, богоразумие и высоту жития и кончины ваша. О святыи царю Николае, ты достойно несл еси бремя правления державою, яко послушание, Господом данное, со тщанием, любовь и страхом Божиим, ведая, яко един Господь управляет стезями человеческими, и воспевая хвалебную песнь Творцу: Аллилуия.

Икос

6

Возсияша, яко звезды путеводныя царству Российскому, седмочисленнии мученицы, Небеснаго Иерусалима украшение, к горнему путь указующия. Мы же, взирающе на образ ваш, с радостию возносим вам песни таковыя:

Радуйтесь, яспис веры в основание храмины сердечныя положившии; Радуйтесь, из сардоникса смирения дом душевный устроившии.

Радуйтесь, сапфиром целомудрия увенчаннии; Радуйтесь, аки халкидон, в нетленной чистоте прекраснии;

Радуйтесь, смарагдами богословия ум и сердце питавшии; Радуйтесь, горящии духом пред Богом, аки сардий.

Радуйтесь, блистающии, яко хрисолиф, преподобием; Радуйтесь, сияющии, яко хрисопрас, правдою.

Радуйтесь, вирилл сокрушения сердечнаго обретшии; Радуйтесь, благотворением, аки топазием, венец украсившии.

Радуйтесь, быша бо капли кровей ваших аки иакинфы; Радуйтесь, амефист небесный улучившии терпением.

Радуйтесь, святии Царственнии страстотерпцы, земли Российския заступницы.

Кондак

7

Хотя Человеколюбец Господь всем людям спастися и в разум истины приити, яви вселенней святого царя Николая, иже просия, аки луча благодатная, посреде нечестия и богоотступления, являя благий пример жития христианского. Последи же мученическую кончину прият Государь, да присно молит Бога о стране своей, поя Ему: Аллилуия.

Икос

7

Новаго Иова Многострадального возрасти Церковь Русская, святого царя страсотерпца Николая, в день праведнаго Иова на свет Божий рождшагося. Ты бо, святыи мучениче Николае, всех прости еси, повелевая не мстити за тя, и рекл еси, яко зло погибнет, едина же любви победит. Благодаряще убо Господа за вся, вкупе с царицею и чады душевная и телесная страдания претерпел еси. Темже и мы, дивящесе крепости духа вашего, о святии страсотерпцы Царственнии, вопием вам сице:
Радуйтеся, крест, Христом Богом благословенный, на рамена вземшии;
Радуйтеся, в жертву за люди своя принести себе готовии.

Радуйтеся, присными оставленни,
благодатию же укрепляеми; Радуйтеся, яко

ничтоже возможно отлучити вас от любви Христовы.

Радуйтесь, вы бо, на Христа взирающе, по водам страданий ко Господу прешли есте; Радуйтесь, молитвою ко Иисусу Сладчайшему горечь заточения услаждавшии.

Радуйтесь, представившии уды ваша в оружия правды Богови; Радуйтесь, Христови сораспеншиися.

Радуйтесь, кротостию ненависть истреблявшии; Радуйтесь, ни единому же злая за зло воздававшии.

Радуйтесь, овчата белорунная, на пажити Христовой упасшаяся; Радуйтесь, Господу пастыреначальнику до конца последовавшии.

Радуйтесь, святии Царственнии страстотерпцы, земли Российския заступницы.

Кондак

8

Странное и преславное чудо явися в стране Российстей, дом Пресвятыя Богородицы нареченней. Бысть бо, егда отступиша людие от веры, внемлюще учением бесовским, сотвориша беззаконие и неправду и отрекошася от Царя – Помазанника Божия, тогда Царица Небесная Сама скипетр и державу прият в Пречистыя руке Свои. Ты же, о святой царю Николае, за неверная и стропотная чада твоя умоляя, выну

пред Престолом Божиим воспеваеши: Аллилуия.

Икос

8

Весь исполнен злобы, враг рода человека воздвиже в стране нашей гонение лютое от людей безбожных и зверонравных, и потекоша реки крове христианския. Вы же, все упование на Бога и Пречистую Богородицу возложивше, ничесоже убоялися есте, на подвиги древних мучеников взирающе, духом же прозревающе, яко чрез страдания и скорби сия приведет Господь Россию к велицей славе. И мы, покланяющесе подвигом вашим, вопием вам сице:

Радуйтесь, Господа не отвергшиися пред человеки; Радуйтесь, держасте бо исповедание упования неуклонное.

Радуйтесь, мучителей своих простившии; Радуйтесь, за врагов с любовью молившиися.

Радуйтесь, воины Христовы, явльшии мужество неборимое; Радуйтесь, оружием Креста видимыя и невидимыя враги победившии.

Радуйтесь, бисери духовнии, нить многоценную составившии; Радуйтесь, союзом любви соединеннии.

Радуйтесь, утешение в Божественной литургии обретавшии; Радуйтесь, друг друга

любовию укреплявшии.

Радуйтесь, слезами своими огонь праведнаго гнева Божия угашающии; Радуйтесь, молитвами вашими покров небесный народу своему исткавшии.

Радуйтесь, святии Царственнии страстотерпцы, земли Российския заступницы.

Кондак

9

Все естество ангельское удивися, зряще, како посреде лета воспеша Государь и вси людие Российстии Пасху, прославляюще Саровскаго угодника Божия досточуднаго Серафима. Темже и преподобный, по обетованию своему, прослави тя, богоблаженный царю Николае. Мы же славословим Господа, дивнаго во святых Своих: Аллилуия.

Икос

9

Ветия многовещанныя не возмогут изреци по достоянию полноту попечения вашего о стране Российстей и людех ея. Вы бо, аки делатели усердни, вся благая соделасте вертограду вашему, чающе, да принесут людие плоды добрыя, сотвориша же тии терние. Обаче вы, народ свой простивше, молили есте Бога о вразумлении онаго и о спасении. Мы же, недостойная чада ваша, воспеваем вам:

Радуйтесь, блаженнии, званнии на вечерю брака Агнча; Радуйтесь, яко белыя горлицы к небу возлетевшии.

Радуйтесь, яко седмисвещник святой у Престола Божия горящий; Радуйтесь, в радость Господа своего вшедшии.

Радуйтесь, Ангелов веселие и ликование; Радуйтесь, прибежище наше в скорбех и обстояниих.

Радуйтесь, маслины многоцелебныя, недуги наша исцеляющии; Радуйтесь, в земных нуждах благовременно нам помогающии.

Радуйтесь, благоуханием мира, от икон ваших истекающим, всю Россию исполнившии; Радуйтесь, российских царей достолепное украшение.

Радуйтесь, бысте бо общницы мудрым девам; Радуйтесь, в чертозех светлых вселившиися.

Радуйтесь, святии Царственнии страстотерпцы, земли Российския заступницы.

Кондак

10

Спасти хотяще люди русския, святии царственнии страстоносцы, не оставили есте народа своего, но присно с нами духом пребываете. Подвигом добрым подвизаетесь, течение скончате, веру соблюдете, темже уготова вам Господь венцы правды. И мы,

благодаряще вас и во святых вас прославляюще,
непрестанно Богу вопием: Аллилуия.

Икос

10

Стена и ограждение стране Российской
явился еси, святой царю самодержавный, мудро
управляя царством, от Бога тебе врученным, и
ко благу вся руководяй. Ты бо, аки мнози от
князей древних, яко солнце пресветлое явился
еси Отечеству твоему и, святым Борису и Глебу
подобно, страсотерпческим подвигом
праведное житие увенчал еси. Мы же, о святии
страдалцы державнии, благодарне глаголем
вам сицевая:

Радуйтесь, чадам Церкви возлюблении;
Радуйтесь, духом радования нас исполняющими.

Радуйтесь, приводящие заблудших к свету
истины; Радуйтесь, Православие своею жизнью
утверждающие.

Радуйтесь, воинства российского
покровителие; Радуйтесь, защитницы наши и
скории помощницы.

Радуйтесь, предстательством вашим
исцеление и очищение душам нашим
приносящие; Радуйтесь, свободящие нас от
пленения страстьми.

Радуйтесь, от клеветы нас избавляющие;
Радуйтесь, злых и лукавых людей

вразумляющих.

Радуйтесь, благоухание небеснаго сада;
Радуйтесь, богокраснии цветы райстии.

Радуйтесь, святии Царственнии
страстотерпцы, земли Российския заступницы.

Кондак

11

Пение умиленное приносим вам,
всехвальнии, яко праведным благоверным
царем и страстотерпцем Христовым. Ныне же
молим вы усердно: умолите милостиваго
Владыку, да простит нам беззакония наша и да
сподобимся купно с вами воспевати Создателю:
Аллилуия.

Икос

11

Светоподательная свеща бысть всей
вселенней житие ваше, озаряюще,
просвещающе и согревающе сердца человеков.
Темже Твоим светом озари, Христе, и
помышления наша, молитвами святых
страстотерпец Твоих, ихже с любовию ублажаем
похвалами таковыми:

Радуйтесь, вкупе со Ангелы хвалу Господу
воспевающих; Радуйтесь аки лучи солнечныя
мрак греховный разгоняющих.

Радуйтесь, страданьми к великой славе
прешедшии; Радуйтесь, соделавшиися

световидны храмы Божества.
Радуйтесь, яко души ваша желяху и
скончавахуся во дворы Господни; Радуйтесь,
яко сердца ваша возрадовашася о Бозе живе.

Радуйтесь, всею Россиею прославленнии;
Радуйтесь, во всем мире Православнем
почитаемии.

Радуйтесь, небесною прохладою в знои
скорбей нас орошающии; Радуйтесь, утешение и
отраду нам подающии.

Радуйтесь, зари не вечерняя златое сияние;
Радуйтесь, света неземнаго причастницы.

Радуйтесь, святии Царственнии
страстотерпцы, земли Российския заступницы.

Кондак

12

Благодать Господня опочи на вас, осеняющи
над главою в день брани. Слышаще же словеса
Господня: «Претерпевый до конца, той спасен
будет», достойно шествие земное скончали есте,
в скорбех воспевающе Богу: Аллилуия.

Икос

12

Поюще ваше прославление, радуемся
радостью неизреченною: вы бо, якоже
вавилонстии отроцы богочестивии, во огни
страданий росую Духа Святаго осенени бысте.
Темже молим вас: и нас огня будущего

молитвами вашими избавите, да воспеваем вам:

Радуйтесь, семена Божественного Слова в сердца приемшии; Радуйтесь, плоды добрых сотворшии.

Радуйтесь, нищетою духовною богатящися; Радуйтесь, из горючннх зерна смирения возрадившии райское древо спасения.

Радуйтесь, кротостию Господу подражавши; Радуйтесь, насыщаемии правдою Божиею.

Радуйтесь, многоценный бисер любви стяжавшии; Радуйтесь, пшенице чистая на ниве Христовой.

Радуйтесь, миротворцы, мира духовнаго исполнении; Радуйтесь, неправедно гонимии.

Радуйтесь, молитвы щитом от соблазнов мира огражденнии; Радуйтесь, сокровенное жительство о Бозе аки маргарит обретшии.

Радуйтесь, святии Царственнии страстотерпцы, земли Российския заступницы.

Кондак

13

О всеславнии и великоименитии Христовы угодницы, страстотерпцы царю Николае, царице Александро, цесаревиче Алексие, царевны Ольго, Татиано, Марие и Анастасие, венец златый державы Российския составлявшии! Приимите милостивно нынешнее малое моление

наше, от любящих сердец благоговейно вам приносимое. Яко велие имуще дерзновение ко Господу, молитесь о всех нас и о земном отечестве нашем, да обрящем милость в день судный и сподобимся в Царствие Небесное внити, воспевающе непрестанно Богу: Аллилуия.

(Сей кондак глаголи трижды. А по сем чтется Икос 1 и Кондак 1)



**ПОЛНЬІЙ
АКАФИСТНИК
КАНОНИЧЕСКІЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НОВОЕ
НЕБО**